

Vol. 38.8

140




IOANNIS  
FREINSHEMII,  
LAUDATIO POSTHUMA,

AUCTORE  
ABRAHAMO FREINSHEMIO.

M. DC. LXI.





Matronæ Ornatissimæ

ELISABETHÆ BERNEGGERIÆ,

Adfini Suavissimæ

ABRAHAMVS FREINSHEMIVS  
S. P. D.



**L**audationem posthumam,  
qua nuper JOANNEM  
FREINSHEMIUM pa-  
truum meum maritum  
tuum, optimum sane, ac desideratissi-  
mum, meritissimo honore prosequutus  
sum, ad te potissimum mittere placuit,  
tum ut pietatem meam in defunctum  
tibi approbarem; tum ut grauisimo lu-  
ctu oppressam, iustissimo solatio adfice-  
rem. Nam FREINSHEMIUS quidem  
noster bene habet: nisi forte quod de  
Saone Diconis filio Callimachus adfir-  
mauit, nos de homine, ut ita dicam, Chri-  
stianissimo asserere dubitamus:



174

**M**orte perire omnia, vulgari pro-  
 uerbio loquimur: quod ut in ce-  
 teris forsitan rebus verum sit, in a-  
 more certe locum non habet, qui ubi se-  
 mel ex veris honestisque causis conua-  
 luit, obitu amici capitis adeo non extin-  
 guitur, ut potius gliscat, & inter alimentā  
 sua ipsam defuncti memoriam, ipsam ab-  
 sentiam numeret. Id quod ego ingenti  
 quidem, sed eodem tristissimo documen-  
 to expertus sum, audito nuper fato viri  
 summi & incomparabilis IOANNIS FREINS-  
 HEMII, quem mihi natura patrum, affe-  
 ctus patrem, conuictus hospitem, institu-  
 tio præceptorem, benignitas patronum  
 dederat. Cuius quidem excessu tantum  
 abest ut expirauerit amor noster, ut bona  
 illa donaque, quæ quondam in superstite  
 coluimus, amauimus, admirati sumus,  
 post fatum maiora etiam atque augustio-

ra animo nostro obuersionem. Atque  
 vtinam quanta nobis laudandi FREINSHE-  
 MII necessitas incumbit, tanta etiam fa-  
 cultas daretur, atque copia? efficeremus  
 profecto, vt omnes intelligerent, illum  
 virum non modo in omni genere crudi-  
 tionis excellentissimum, verum etiam vi-  
 ta moribusque uirtuti similitimum fuisse.  
 Sed præter ingenii imbecillitatem, & de-  
 suetudinem studiorum, & varie interpel-  
 lantes Reipublicæ curas, luctus etiam  
 mœrorumque adeo perturbat animum, vt  
 nec inuenire quæ oporteat, nec inuenta  
 disponere, nedum exornare vlla ex parte  
 valeamus: sed videamur rudes dicendi,  
 videamur indocti, dummodo officii nos  
 memores fuisse atque pietatis appareat.

Natus est IOANNES FREINSHE-  
 MIUS Ulmæ Sueuorum A. D. XVI. Kal.  
 Decembr. anno huius seculi octauo, ho-  
 nestis splendidisque parentibus, IOAN-  
 NE BARTHOLOMÆO FREINSHEMIO, & ELISA-  
 BETHA MEYELIA. in puero statim eluxit  
 igneus

igneus ingenii vigor, facilis & fida memoria, admirabilis recti honestique amor, quibus animi bonis accedebant corporis dotes, validus membrorum & decens habitus, vegeti & acres oculi, frons porrecta, nasus regius, magna oris dignitas: prorsus ut cælesti illi ac diuino animo dignum domicilium contigisse videatur, in quo habitaret, atq; tot egregias curas, tot in omne æuum mansura opera perageret. neque fefellit tanta indoles optimos parentum, quam ut ad cultum futuramque magnitudinem perducerent, nec curæ perpercerunt, nec impensis: quare effectum est, ut cum aliorum fideli operatum in primis clarissimorum virorum HONOLDI & WOLLEBII accuratissima institutione isthæc Musæ proles ea studiorum fundamenta tenerrima in ætate feliciter poneret, sine quibus ad veræ sapientiæ laudem decusque aditus non est. Certe anno vitæ decimo quarto expleto (properandum enim nobis, ut quibus tot tantaque

taque dicenda adhuc restant ) dignus omnibus visus est *o pueris* noster , ut relictis inferioribus Scholis , Academias inuideret. Venit igitur Marpurgum, deinde Gießam, quibus in locis ita legum difficilimo & vastissimo studio incubuit , ut doctores eius tantum ingenium , tantos profectus non citra stuporem intuerentur. Ita enim rapiebat cuncta ac penetrabat, ut non noua addiscere, sed dudum cognita repetere ac reminisci videretur. memini ab ipso audire, admonitum se ultro à Professoribus fuisse, ut solenne Candidatorum examen subiret, meritumque Doctoris nomen & iura expeteret. Sed non poterat vna acquiescere laurea immensus ille & cælestis animus, qui magnitudinis suæ sibi conscius , omnes scientias, omnes disciplinas, spe, successu, voto sibi vendicabat. Ergo fatis ad maiora ducenibus, Argentoratum petiit, urbem & ciuium humanitate & Doctorum Academicorum fama, & Magistratus pruden-

tia celebratissimam. Hic occasione carminum Germanicorum & aliquot acutè dictorum, (erat enim, ut de eo vir maximus merito olim pronunciauit, totus apophthegmaticus) MATTHIÆ BERNEGGERO nosci & insinuari cepit, qui vir, uti erat non modo doctissimus, sed etiam humanissimus & optimus (reddendum hic est socero verissimum testimonium, quod ne externo quidem negarem) reperto tali tantoque ingenio lætus, non prius destitit, quam domo, mensa studiis FREINSHEMIUM sibi sociaret. qui nactus instructissimam copiosissimamq; bibliothecam, incredibile dictu est, quantum operæ studiique diu noctuque in euoluendis omnis generis auctoribus collocauerit. nec enim vna disciplina contentus erat, sed quicquid Theologiæ, quicquid Iurisprudentiæ, quicquid Historiarum, Philosophiæ, cæterarumque bonarum artium, vel vetus ætas reliquerat, vel nostra tradiderat, id omne ini-



mitabili diligentia perquirebat, scientia complectebatur, acrimonia penetrabat. quod ut facilius credant, qui hæc lecturi sunt, vno exemplo fidem faciemus. *Berneggerus* periclitandi ingenii causa obtulerat beato nostro *Florum*, addita prece, ut legeret, & si quid correctione aut animaduersione dignum occurreret, obiter enotaret. *Freinshemius* authorem sibi nunquam lectum, & satis difficilem, sex horarum spatio non modo euoluit, sed etiam multis in locis emaculatum emendatumque *Berneggero* reddidit, ingenti hominis non tam admiratione, quam stupore: videbat enim *Freinshemium* alibi sanasse, quæ etiam doctissimorum virorum solertiam effugerant, alibi exercitatissimorum Criticorum coniecturis examussum congruere. Ad hanc diuinitatem ingenii, tantarumque rerum scientiam, accessit insignis plurimarum linguarum peritia; nam præter vernaculam, & quæ doctorum propriæ habentur, Græcam, He-

Hebræam, Latinam, callebat etiam Galli-  
cā, Hispanicam, Belgicam, Italicam, Angli-  
cam, Suedicam, Danicam. His noster arti-  
bus præfidiisq; subnixus, vulgare doctri-  
nam dotesq; suas instituit, multū diuersus  
ab illis, qui citra omnem aut existimationis  
sux aut conscientix curam, cruditatem &  
infantiam studiorum in publicum pro-  
trudere nihil verentur, docentes ante-  
quam didicerunt. Ceterum institutum  
hoc aliquandiu Gallica peregrinatio mo-  
rata est, in qua triennium circiter con-  
sumpsit, vsus contubernio viri Illustris  
MICHAELIS MARESCOTTI; quamquam  
interea non cessaret, sed plurima legeret,  
& sub titulo Secretarii Regii Episcopatus  
Metensis tabularium recognosceret. In-  
de redux, ducta in inatrimonium BER-  
NEGGERI filia ELISABETHA, virgine orna-  
tissima & piissima, amicitiam dudum va-  
lidam nouo isthoc vinculo indissolubi-  
lem reddidit. Tum vero sociatis studiis  
curisque, bone CHRISTE, quot quantosq;  
auctores Græcos & Latinos illustrarunt?

quot notarum sylvas confecerunt? quot accuratissimos rerum verborumque indices composuerunt? ut ipsorum incomparabili labore, ita Reipublicæ literariæ inæstimabili bono. sed *Berneggeri* quidem laudes alii occasione seponemus; *Freinsheimii* vero ingenium eruditionemque nec ostendere melius, nec laudare copiosius queamus, quam si opera eius, tam quæ edita sunt, quam quæ adhuc *in manus* apud hæredes seruantur, singulatim percontemur.

Primum ingenii famæque publicæ periculum fecit, vulgato *Gustavi Adolphi Suedorum Regis* panegyrico, tanto successu plausuque omnium, ut incomparabilis Herois facta & magnitudinem dictis videretur exæquasse atque sensibus. Sequuta est *Flori* editio, quem auctorem in capita & versiculos, ut vocant, distinctum, doctissimis notis illustratum, additis insuper variantibus lectionibus, Excerptis Chronologicis, & copiosissimo

mo

mo utilissimoque indice vsquequaque  
exornatum in lucem emisit , specimen  
exemplumque daturum eius accuratio-  
nis formæque , ad quam deinceps plures  
melioris commatis scriptores è Musæo  
Berneggeriano prodirent. de Potu Cali-  
dæ dissertationem scripsit ad IOANNEM  
KÜFFERUM, celeberrimi nominis medicū,  
qui de illius usu apud veteres dubitauerat.  
nec notæ , quas in Tacitum , familiarissi-  
mum sibi historicū dedit, silentio præter-  
eundæ sunt, breues illæ quidem sed acutæ  
perfecto & valde bonæ. destinauerat au-  
tem in istum scriptorem iustos perfectos-  
que Commentarios concinnare , eum-  
que in finem ingentem apparatus fece-  
rat: sed præuertentes mox aliæ curæ tam  
præclarum inceptum irritum reddide-  
runt. publicando Curtio intentus, quum  
animaduerneret , sub nomine Supple-  
mentorum Curtianorum, ieiunam & mi-  
seram nescio cuius scriptionem circum-  
ferri, ex Iustino & Arriano nullo iudicio

compilatam, miseratus iniquam hanc sortem elegantissimi scriptoris, ipse ex Græcis Latinisque quos in manibus habemus auctoribus, duos priores Curtii libros deperditos, historica gravitate, fide, copia supplevit. Paulo post ipse Curtius prodiit, cum Commentariis plenissimis, de cetero ad eundem fere cultum expositus, quem in Floro superius commendauimus. inter hæc tetrica & seueriora studia lætior scribendi FREINSHEMIO nostro occasio enata est. prouocatus enim insigni nec opina Bernhardi Winariensis Ducis liberalitate, ne minus intelligens videretur tanti muneris, homo inter ceteras suas laudes etiam gratissimus, honori & æternitati inuictissimi herois composuit dicauitque Virtutis speculum, germanico Carmine heroico, in quo Saxonum Ducum inclutam stirpem à Wedekind & Hercule Teutonico altissima origine nec ineptis rationibus deduxit: suauitate, concinnitate, gravitate carminis tanta usus, ut quod huic cōparari, in nostra quidem lingua merito queat, ha-

Et nus non inuenerim. erat enim beato  
 nostro, eximiū prorsus & singulare inge-  
 nium, ut quocunq; illud applicuisset. tibi  
 excellere & primas tenere videretur. sed  
 propemodū me effugerat memorare Pa-  
 raphrasin Cornelianam, qua priores qua-  
 tuor Annalium Taciti libros exposuit, nō  
 eo consilio, ut hac ratione ē manibus ne-  
 gligentium lectorum, rerum Romana-  
 rum florentissimum auctorem excuteret,  
 quod à non nemine doctorum obiectum  
 fuisse scio, sed ut latitantes sub scabritie  
 styli & abstrusis sensibus prudentissimi vi-  
 ri diuitias diligentibus & cordatis erue-  
 ret monstraretq;, eoq; ad perquirendas il-  
 las acrius concitaret. huic operi subiunxit  
 Comparationem Versionū, in qua trans-  
 latorum Taciti interpretationes candide  
 examinauit, nullo alio nec scopo, nec pre-  
 tio nisi assequendæ veritatis; dissimilimus  
 illis qui eruditōrū hominū opera, quæ sæ-  
 pius non capiunt, canina quadā rabie alla-  
 trant ac vellicant, tantummodo ut docti  
 videantur, claritudinemque quam ipsi

non habent , ex aliorum infectatione aut inimicitiis consequantur.

Atq; hæc quidem quantum memini, Argentorati edidit. in Suedia præter vnam orationem & aliquot disputationes nihil typis imprimi curauit: inertia uti puto & imperitia typographorum atq; iniquitate offensus, quod genus hominū sua potius vitia, quam vtilitatem aut decus publicū in consilio habet postquam rediit in Germaniam sequentium publicatione priorem famam auxit & amplificauit. sunt autem ista. Orationes, quas in Suedia diuersis temporibus, de diuersis rebus atque personis habuit, pleræque argumento insignes, verbis splendidæ, tractatione graues, & quæ ad priscae eloquentiæ robur ac maiestatem quam proxime accedant. Supplementa Liuiana, opus magnum, & sine figura loquor, incomparabile. cum enim Historiæ Romanæ princeps iam multis à seculis, parte sui meliore ac



re ac potiore truncatus atque conclamatus esset, eaque de causa doctissimorum virorum grauisimæ quidem & iustissimæ querelæ passim audirentur, sed de remedio nemo ne cogitare quidem auderet, vnus FREINSEMIUS exortus est, qui plusquam Herculeo ausu, laborem infinitum ac difficilimum eo ardore suscepit, eo ingenio & industria tractauit, ea felicitate absoluit, ut periisse Liuium prope modum placeat, quo tanto felicius renasceretur. & sane mirum videri debet, posteriorem horum Supplementorum tomum, etiam nunc ineditum manere; tanta seculi huius vel incuria, vel imprudentia, vel postremo lior est. denique syntagma de Vicariatu Palatino, quod sub nomine Philœci prodiit, FREINSEMI est, non mole quidem operosum, sed argumento illustre, & pondere rationum memorabile.

Non dubito, quin omnes, qui hæc cognoscent, vehementer miraturi sint,



tot tamque præclara opera à FREINSHE-  
 MIO edipotuisse; at hercule nec paucio-  
 ra numero, nec inferiora dignitate sunt,  
 quæ ille edenda adhuc reliquit; ex istis  
 primo loco memorabimus, de Assessoribus  
 theses, accurate diligenterque com-  
 positas, quas publice olim defensusurus e-  
 rat, sed sine Præside. quod quum Profes-  
 sores Juridici contra consuetudinem cō-  
 cedere nollent, vulgare etiam insuper ha-  
 buit. Reliquit & paradigmata Orationum  
 & Epistolarum, laborem ut non specio-  
 sum, ita vehementer vtilem ad Latii ser-  
 monis & eloquentiæ laudem adspiranti-  
 bus. Nec silebimus politicas eius me-  
 ditationes de officio Boni Præsidis, quem  
 ex Tullii epistolis, quas in proconsulari  
 Ciliciæ administratione ad diuersos scrip-  
 psit, effinxit formauitque. Maioris adhuc  
 momenti sunt prælectiones in Laurentii  
 Surii Commentarios, in quibus noster  
 hoc vnice atque solide egit, ut ostensa  
 impudentis monachi nugacitate atque  
 im-  
 po-

impostura, Sleidano nostro veri historici  
nomen laudemque assereret. prælo in-  
super omnino paratas reliquit Phædri fa-  
bulas, quas post diligentissimam recen-  
sionem ita adornavit, ut singulis fabulis  
congruens ex historicis exemplum sub-  
iiceret, ostensurus puto, inique vulgo fie-  
ri, ut mythologi veteres ad pueros tan-  
tum ablegentur, quum illi non minus sa-  
pientiæ tradant in fabulis, quam historici  
sub exemplis doceant. sed vsui præsentī  
forte magis accommodata videri queant,  
quæ de S. R. Imperii Electorum, & S. R.  
Ecclesiæ Cardinaliū Præcedentia compo-  
suit. qua quidem in commentatione, pro-  
positis & comparatis vtrorumque sum-  
mis dignitatibus atque prærogatiuis, dili-  
genter inuestigauit, vtrius prior locus se-  
desque debeat. Nec indicta abire me-  
rentur, Carthaginiensia & Numidi-  
ca: Achaica item & Pergamena, quibus  
homo ingeniosissimus iuxta & laborio-  
sissimus, istarum Rerum publicarum

Regnorumque formas, historias, instituta, diligentissimo studio indagauit examinauitque. Non frustranda etiam sunt sua laude poemata; quæ noster Teutonice & Latine excellenter sane faciebat, sed Germanica lubentius, quod tum alia testantur, tum plerique psalmodi nostrate rythmo expressi, in quibus ubi genium laudaueris, plus tribues pietati. mirandum certe est, *Freinsheimium* defatigari non potuisse, tot scribundis operibus, quot recensendis nos tantum non fessi sumus. Sane superioribus addidit adhuc occasione Supplementorum Liuinianorum Indicem Criticum, ut ipse appellabat, ut ego, Aristarchum Catholicum, in quo classicos auctores vtriusque linguæ propemodum omnes, ordine alphabethico digestos, infinitis in locis expoliuit, correxit, illustrauit. editione quoque dignissimæ forent epistolæ, quarum multas centurias, ad summæ fortunæ doctrinæque homines, de rebus grauisimis dedit, in  
qui-

quibus nec Ciceronis copiam, nec Plinii  
acumen accuratoremque desideres. sed  
quo ego piaculo disputationes in Ethica  
Aristotelis in ultimum locum reieci, quæ  
omnium primo referri merebantur? in  
his enim Socratica colligendi conclu-  
dendique ratione usus, DEUS magne!  
quam solide, quam Christiane, id est, vere,  
differuit docuitque, de beatitudine ho-  
minis, de desiderio illius in homine, de  
illius consequendæ ratione, eademque  
opera inuictis argumentis ostendit, Ari-  
stotelem his quidem in rebus malum cæ-  
cumque esse ducem, fallique omnes qui  
eum sequuntur. Quæ quum nuper lege-  
rem ac meditarer, ita me memini affici, ut  
non tam moueri, quam attolli, quam rapi  
& in cælum ire viderer, atq; adeo nunc et-  
iam iudico, salutis publicæ interesse, ut  
ista tam præclara, tam diuina publici iuris  
fiant; nam ut docti simus tandem non  
est necesse; ut simus boni, siquidem bea-  
ti fieri volumus, vnicuique necesse est.

Ex his igitur quæ partim edidit FREINS-  
HEMIUS noster, partim editioni parata reli-  
quit, (nam alia affecta quidem, sed non-  
dum ad umbilicum deducta de industria  
non attigimus) satis liquere arbitror, fuis-  
se illum virum vndiquaq; doctissimum;  
restat ergo, ut eundem etiam optimum  
fuisse ostendamus. quanquam autem ab  
ipsa doctrinæ excellentia virtus argui  
posse videatur, siquidem.

Ἄν' ἑλλων ἔπαντὶ φαίνονται, ἀλλ' ὅ, τις ἐσθλός.

tamen hoc firmitus demonstrandum no-  
bis esse existimamus, quum sæpe erudi-  
tionem cum improbitate misceri videa-  
mus, & noster quoque verissime dixerit,  
docto nebulone nihil esse deterius.

Sic igitur agebat noster ὁ δαίμωνις, ut  
omnia à DEO deduceret, ad eundem  
referret omnia: hoc vno aiebat indi-  
gere hominem, nec posse in minori condi-  
tione adquiescere: ut vero ad tantum

DO-

DOMINUM peruenire, eiusque gratiam  
 consequi queamus, opus nos habere  
 recta via; eam porro & vnam & veram  
 esse CHRISTUM, per quem omnia  
 nobis tribuat cœlestis Pater abundantif-  
 sime. ergo ut non modo æterna sapere,  
 sed etiam in temporalibus prudenter ver-  
 sari possimus, vnum esse necessarium  
 DEUM, & conciliatorem CHRISTVM.  
 hoc duce nos consequi omne bonum,  
 atque omnem veritatem. at profecto  
 male & præpostere vulgo homines agere,  
 qui suo consilio, suo ductu, neglecto di-  
 uino auspicio vtantur. sic enim fieri, ut  
 sæpissime labantur, atque errent, nulla  
 moderatione in secundis, nulla consola-  
 tione in aduersis: atque hæc non verbis  
 tantum crepabat, sed vita etiam ex-  
 primebat atque moribus: precator  
 assiduus, & diuini verbi mediator deuot-  
 tissimus. huic enim tribuebat omnem  
 honorem; ab hoc sibi affulgere lucem;  
 in

in omnibus rebus asserebat, ad hoc denique ceu Lydium lapidem omnem diuinam & humanam sapientiam explorabat. qua de caussa in omnibus consiliis actionibusque mirifica constantia utebatur, nec temere cuiusquam vnquam rei illum pœnitere memini. dirigebat enim ex certis & diuinis principiis omnia, casum & cetera quæ illi contribuuntur, non magnopere ad se pertinere existimans. in primis autem officium hominis meditabatur, & ad illud intelligendum implendumque omni ope contendebat. multum conquerens de mortalium incogitantia, qui cum artem bene arandi, ædificandi, nauigandi diligentissime inuestigauerint tradiderintque, artem bene viuendi transmiserint, tanquam illa aut nō daretur, aut vsu minime necessaria aut denique perceptione facilima foret; quum interim ex huius vnus contemptu vel ignorantia, tot errores, tot miseriæ, tot vitia in humana vita reperiantur, quæ nullis legibus, nullis pœnis satis coerceas.

offi-



officiis ac dignitatibus quum vteretur  
splendidis, nihil ex illis æstimabat præter  
ordinem, à DEO rebus inditum, ambitio-  
nem illis relinquens, qui nimia sui æsti-  
matione, nimio aliorum contemptu ad  
vanissimas ineptias prolabantur, nihila-  
liud laturi, quam ut ludibrium debeant  
prudentibus, qui huius farinæ homines  
intus & in cute nouerunt, atque suo mo-  
dulo suoque pede metiri didicerunt. offi-  
cii curas laboresque non modo sine tæ-  
dio, verum etiā cum voluptate obibat, ni-  
hil esse suauius dictitans homini, quā par-  
tibus à DEO iniunctis, rite fungi. Copia  
bonorum affluens, ea ita vsurpabat, ut nec  
parceret pecuniæ vbi ratio exigeret, nec  
proiiceret citra causam, atque hoc loco  
pateret latissimus sane campus laudandæ  
FREINSHEMIANÆ liberalitatis, quam  
non modo in pauperes CHRISTI, quos  
commendatissimos sibi habebat, sed et-  
iam in alios honestos quidem, sed egen-  
tioris fortunæ homines cognatosque,

D

mu-



munifice exercuit; quorum quidem prolixum catalogum recensere possemus, si aut pudor illorum hoc permetteret, aut FREINSHEMIUS noster ita vellet, qui non ideo bene fecit, ut videretur, sed ut faceret. in cetera quoque vita idem virtutis tenorerat; mira admissionum facilitas, suavis conuersatio; in amicitia legenda singularis prudentia, in tuenda immutabilis constantia, & ut breuiter omnia contraham, in actionibus consiliisque cunctis, incredibilis integritas atque candor, quem etiam quum summorum Regum Principumque aulas tot per annos frequentaret, ingenti animo retinuit, sine vlllo detrimento gratiæ, quam alii per byssina verba & turpissimas adulationes frustra sæpius affectant.

Tali igitur virtutis, tali eruditionis fama quum floreret FREINSHEMIUS, non opus habebat ambire honores, atque officia: veniebant enim vltro, variisque ex locis offerebantur, honoratæ viuendi cōditio

ditionēs splendidæq; Sed multis ambien-  
tibus præualuit Suedia, Germaniæq; hoc  
decus eripuit, posseditq; compluribus an-  
nis, mira quadam factorum industria, ut re-  
gnum dudum armis inclutum, etiam lite-  
rarum gloria inclaresceret. quæ quidem  
tempore , quum multi amicorum si-  
bi patriæq; retinere cuperent virum ma-  
ximi nominis atq; optimi, interq; alia, et-  
iam pericula viæ & longinquitatem, nau-  
seam maris & asperitatem Septemtrionis  
allegarent, nostrum ita respondisse recor-  
dor ; sibi vero constare vocationem  
suam in Suediam esse diuinam, eaque de  
caussa sequi velle: ut eat Ubsaliam ne-  
cesse esse , ut perueniat , non esse ne-  
cesse. Sed peruenit profecto feliciter,  
ducente DEO , qui iusserat ire. quanta  
porro ibi gloria, quanto studiosæ iuuen-  
tis fructu , Politicæ ac Eloquentiam  
professus sit ; omnis Suedia testis est.  
Nos quidem qui illius sectatores assi-  
dui fuimus atque indefessi , sancte

confirmare possumus, cum in tradenda  
 ciuili prudentia minime triuiali methodo  
 vsum, sed illam ex optimis historicorum  
 ac Philophorum solide eruisse atq; mon-  
 strasse, eliminatis longe lateque fraudi-  
 bus, technis, & vaframentis, quæ pseudo-  
 politici loco sapientiæ obtrudunt; com-  
 mendatis contra plurimum fide, pruden-  
 tia, virtute, tanquam summis & præ-  
 cipuis humani generis bonis. quæ autem  
 propositurus erat auditoribus diligen-  
 tissime prius meditabatur, adeo, ut non  
 modo literis, sed etiam memoriæ manda-  
 ret omnia. eadem excellentia Eloquen-  
 tiam docuit, cuius præceptis quantum o-  
 puserat ex præstantissimis auctoribus in-  
 culcatis, ad exercitationem styli dicendi-  
 que vnice hortabatur discipulos, quoque  
 alacriores fierent, ipse, quod efficacissi-  
 mum docendi genus est, præibat viam de-  
 clamabatque frequentissime. Sic quin-  
 quennio ferme exacto Holmiam com-  
 migravit Bibliothecarii & Historiogra-  
 phi

phi Regii splendidissima munia obiturus:  
 ad hæc enim vocauerat illum CHRISTI-  
 NA, quod vocabulum omnibus titulis au-  
 gustius est, oblato in singulos annos bis  
 mille imperialium stipendio, & libero  
 præterea victu. quæ ex re tum FRÆIN-  
 S-HEMIANUM meritum, tum incompara-  
 bilis Principis munificentiam rectissime  
 æstimaueris. Cuius aliud quoque paulo  
 post insigne documentum dedit, donatis  
 nostro vna vice quingentis ducatis, vti  
 vocant, quod natalem suum egregia ora-  
 tione celebrauisset. hoc loco dubitatu-  
 ros nonnullos existimo, annon limites  
 liberalitatis excefferit gloriosissima Prin-  
 cept, tot tantaque literatorum hominum  
 ordini largiendo? nos ita iudicamus, ni-  
 mium non esse, quod dignis tribuitur;  
 ceterum ad hõs intelligendos reperien-  
 dosque, dilectu opus esse: nam ut veri  
 ac genuini Musarum filii, vehiculorum  
 instar seruiunt magnis Regibus Princi-  
 pibusque, quibus ad famam & æternita-

tem feliciter nituntur ; ita illiterati illi literatores summorum Monarcharum res atque decora deterunt potius, quam illustant. Qua de causa Augustum quondam , laudis gloriæque ad posteros cupidissimum Principem , prætoribus mandasse, legimus , ne nomen suum promiscuis commissionibus obsolescere paterentur.

Inter hæc firmata per Germaniam pace, cupido remeandi in patriam nostrum inuasit, non tam ut patrimonium constitueret , quam ut deficienti indies valetudini consuleret. Petita igitur impetrataque venia reuisit natale solum , non tantum honoribus quos supra memorauimus insignis, sed etiam illustri Consiliarii Regii titulo auctus. Sed fefellit eum sua opinio: nam imbecillitas corporis nihil remittebat , & tum aliæ inopinatae curæ, tum imprimis calumniæ litium exercebant hominem sanctissimi propositi, quo

gene-

genere morbi Germania nostra iam ab aliquot seculis grauitate sane decumbit eo libentius paruisse crediderim, permitte CHRISTINA Regina, uocationi, quae a Serenissimo Electore Palatino, inuitatus fuit Heidelbergam, sub honore & titulo Consilarii Electoralis & Professoris Honorarii, notabili ante alios praerogatiua & praecedentia: quo fere pacto vir illustrissimae originis famaeque Iosephus Scaliger apud Belgas claruit, & lumen illud eruditorum Erasmus Roterodamum ab Ernesto Bauariae Duce Ingolstadium accitum fuisse legimus. qua autem grauitate, industria, prudentia, duplicem hanc Spartam ornauerit noster, nil attinet verbose demonstrare: res enim in aperto est, & fama publica loquitur. Et profecto duas res, quibus absolui humana felicitas uidetur, FREINSHEMIUS assequutus est, ut bene uiueret, & bene audiret. Ex quo incredibilis ueræ virtutis vis atque efficacia elucet, cui fren-

frendente licet invidia, fama atque honor  
 vltro famulantur. Nostro quidem, quum  
 bonæ mentis & honestorum studiorum  
 præmia in ipsis sita esse sapientissime exi-  
 stimaret, nec præterea quidquam require-  
 ret, opes, fama, gloria, sponte venerunt.  
 quod partim ex his quæ diximus, manife-  
 stum est, partim ex sequentibus citra o-  
 mnem controuersiam manifestum fiet.  
 Equidem si amplum atque magnificum  
 habetur à claris laudatisque viris nosci, a-  
 mari, coli, quis nostrum satis extulerit lau-  
 daueritque, cui non modo eximix æqua-  
 lium amicitix contigerunt, verum etiam  
 illustrium atque in summa dignatione po-  
 sitorum hominum, imo ipsorum Principum,  
 Ducumque & Regum familiarita-  
 te, gratia, patrocínio, inclarescere, æstima-  
 ri, locupletari, datum fuit? Et, ut veluti  
 in transitu tantummodo nominemus  
 viros meritissimæ famæ, quibuscum  
 FREINSEMIUS amicitiam exercuit, Vos-  
 sios, Grotios, Heinios, Salmasios, Bar-  
 laeos,



læos , Bœcleros , Gronouios , Dio-  
 datos, Gothofredos, Styrtzelios, Scheffe-  
 ros, Loccenios ; Charus honoratusque  
 fuit Forstneris, Mockelius, Vicquefortis,  
 Snolskiis, Peyeris, Marefcottis, Canutis,  
 hominibus & natalium splendore, & me-  
 ritis in Rempublicam prælustribus :  
 quorum laudes & decora pro virili trade-  
 remus , nisi augustissima nomina maie-  
 state sua prorsus nos obruerent, ac veluti  
 opprimerent; illud fulmen belli Bern-  
 hardus Vinariensis, illud literarum sum-  
 mum præsidium Augustus Brunswicen-  
 sium Dux, illa Musa decima ELISABETHA  
 Palatina, illud prudentiæ vnicum speci-  
 men Elector Palatinus, ille orbis ocellus  
 Regina CHRISTINA, illud denique præsi-  
 dium suorum, terror hostium CARO-  
 LUS GUSTAVUS Rex Suedorum, qui omnes  
 nostrum singulari gratia atque munifi-  
 centia, prosequuti sunt : & certe super-  
 sunt adhuc multæ ab his ad FREINSHE-  
 MIUM ipsorum manibus scriptæ epistolæ,

E

quæ



quæ veluti ancilia quædam cælo delapsa,  
aut venerandæ Sanctorum reliquiæ  
religiosa cura asseruantur. Conti-  
nent enim & auctorum suorum memo-  
randæ ad posteros humanitatis, & FREINS-  
HEMIANÆ virtutis certissimum testimo-  
nium.

Quam bene vitæ mimum egerit  
FREINSHEMIUS *ὁ θαυμάσιος* memorauimus ha-  
ctenus, nunc mortem exponemus, quæ  
vti nobis ingentem mœrorem attulit, ita  
defuncto læta, & expectata, & beatissima  
contigit. Feliciter enim expertus est,  
quod superstes confirmabat sæpius, mor-  
tem neminem contemnere posse, nisi  
Christianum. Spectemus igitur, firma-  
turi animum tam constanti exemplo, ut  
viuamus tanquam morituri, ut moria-  
mur tanquam victuri. Sic autem nar-  
rauit mihi suprema hominis sanctissimi,  
vir summæ & humanitatis & doctrinæ  
Heinricus Holstius, qui omnium testis  
fuit *ἀνθρώπος ὁ θαυμάσιος*: quum instare sibi intelli-  
geret


geret decretoriam illam horam, sacra Domini Cœna summa cum deuotione esse vsum; deinceps dictum Biblicum indicasse, quod in funere suo explicari vellet; paulo post quieto compositoque animo in hæc verba prorupisse: sermo quidem me deficere incipit, ceterum metum vel dolorem mortis non sentio: inclinatis inter hæc ac nouissima in luce deficientibus oculis, admonitum ab ipso, meminisset omnis illius bonæ consolationis, quam in beatum Taubium (is nobilis Danus fideique Holstii commissus non ita pridem Heidelbergæ decesserat) tam efficaciter, tamque abundanter effudisset, eandemque in ultimo vitæ articulo sibi quoque accommodaret, collectis extremo nisu viribus, Amen, Amen, respondisse, atque sic non mortuum esse, sed obdormisse: stupentibus cunctis qui aderant, atque talem finem religioso cum horrore intuentibus. O beatam *invariam*! O singularem constantiam!

tiam ! quis te virorum optime mortem  
contemnere docuit , à qua omnis natura  
abhorret, ad cuius ipsum vocabulum tan-  
topere plures expauescunt ? scil. CHRI-  
STUS ille amor tuus ac deliciæ, quem o-  
mini vita coluisti, amasti, prædicasti, adfuit  
tibi in extremis , morbi que ac mortis o-  
mnem cruciatum compressit ac sustulit,

*Excelsaque stetit victorem in rupe Sionis.*

Salve igitur omnium bonarum litera-  
rum Vindex atque Stator , Philosopho-  
rum Christianorum Princeps, omnis vir-  
tutis, constantiæ, candoris vnicum exem-  
plum, Principum Regumque cura atque voluptas, sal-  
ue, inquam, & æternum vale. quod si piis manibus re-  
rum humanarum vlla adhuc cura superest, supremum  
huncce honorem, & vltimum munus , quod cum ge-  
mitu, cum lachrymis , cum afflictione cordis tibi offe-  
rimus, mitis placatusque suscipe. Nos vbi ordo natu-  
ræ permiserit sequemur ; interea contra seculi iniqui-  
tatem & malitiam, contra imperitiam & liuorem,  
à memoria virtutum tuarum, ab eruditione,  
à constantia, præsidium atque solatium  
mutuabimur,

F. I. N. I. S.



# JOANNES FREINSHEMIUS

Lucem primum adspexit Vlmæ.

A. D. XVI. Kal. Decembris

Anno Christiano M. DC. VIII.

Academias inuisere cepit natus annos quindecim,

Maximè vero profecit ARGENTORATI,

Adiutus humanitate, consiliis, exemplo

Viri Optimi atque Doctissimi

MATTHIÆ BERNEGGERI.

Inde vocatus à Viro quodam Illustri in Galliam

Inter Regis Secretarios Interpretes locum tenuit.

Anno Christiano M. DC. XXXIV.

Reuersus inde ad BERNEGGERUM suum,

Eiusque Filia ducta A. C. M. DC. XXXVII.

Commune cum eo rectum, mensam, museum,

Bibliothecam, studia prope omnia habuit.

Hinc in SUECIAM accitus, VBSALIÆ

Professorem Politices egit & Eloquentiæ.

Anno Christiano M. DC. XLII.

Donec post quinquennium in aulam adscitus Regiam

Iucomparabilis illius CHRISTINÆ iudicio,

Sub Regii Bibliothecarii & Historiographi titulis

A studiis Serenissimæ REGINÆ factus est.

Valetudine vero frigidioris Cœli impatiente,

In patriam se recepit Anno M. DC. LI.

Vbi tum Serenissimus ELECTOR

Palatinam instaurans Academiam

Præsentiam illius operamque desiderare cepit.

Huic ille vocationi lubens meritoque paruit

Sed non ante consensum Serenissimæ Reginæ,

Quæ A. M. DC. LV. per Germaniam transiens

Consiliarium numero eum addidit.

Igitur Anno sequenti profectus Heidelbergam.

Serenissimi ELECTORIS Consiliarius.

Et nouo nostris Academiis Exemplo.

Professor HONORARIUS constitutus est.

Adeptus ista sine ambitu:

Functus sine tardio:

Reliquit sine mœrore:

Heigelb. Ann. M. DC. LX. pr. Kal. sept.

Vnum memor esse necessarium.

